



## Straitéis Tinrimh

Tá straitéis tinrimh curtha i bhfeidhm i Scoil Chualann le ceithre bliana anuas. Rinneadh athbhreithniú ar an straitéis seo i Mí na Nollag 2011. Socraíodh cloí leis an straitéis mar a bhí ó tharla go raibh ag éirí go maith leis. Is léir ón tinreamh go ndéanann tuismitheoirí na scoile sár-iarracht a gcuid páistí a chur ag an scoil in am agus go rialta.

Is mian linn atmaisféar sona, spreagúil, sábháilte, cineálta a chothú ina ndéantar cúram d'fhorbairt iomlán an pháiste. Aithnímid i Scoil Chualann an tábhacht a bhaineann le deá-thinreamh i ndul chun cinn an pháiste. De réir Alt 20 agus 21 den Acht Oideachais (Leas) 2000, tá sé de dhualgas ar scoileanna taifead tinrimh a chur ar bun agus monatóireacht a dhéanamh ar thinreamh gach dalta atá ar rolla na scoile. Is gá tuairisciú ar thinreamh daltaí i gcúinsí áirithe.

Is í aidhm na straitéise seo ná

- meas ar an léann a chothú i measc phobal na scoile
- béim a chur ar an tábhacht a bhaineann le deá-thinreamh
- dearcadh dearfach i leith na scolaíochta agus na foghlama a chothú
- a chinntiú go bhfuil spriocanna cinnte ann chun deá-thinreamh a spreagadh

### Ról an Tuismitheora/Chaomhnóra

- Is gá do na tuismitheoirí litir/nóta a scríobh i dtaobh as láithreachtaí nuair a chailleann páiste lá/am scoile.
- Más gá do pháiste an scoil a fhágáil i rith an lae caithfidh an tuismitheoir/caomhnóir nóta a scríobh dóibh. Tugann an páiste an nóta don mhúinteoir ranga. Cuireann an múinteoir an nóta ag an bpríomhoide agus sínítear é. Iarrtar ar thuismitheoirí/ chaomhnóirí/fheighlithe/ghaolta gan cur isteach ar obair ranga i rith am scoile mar sin caithfidh an duine a thagann faoi dhéin an pháiste an leabhar tinrimh a shíniú san oifig agus cuirfear fios ar an bpáiste.
- Iarrtar ar thuismitheoirí/caomhnóirí a chinntiú go dtagann a bpáistí ar scoil gach lá seachas nuair a bhíonn leithscéal ceart acu le bheith as láthair.
- Iarrtar ar thuismitheoirí/chaomhnóirí glaoch a chur ar an scoil má bhíonn páiste sa bhaile níos mó na dhá lá.
- Iarrtar ar thuismitheoirí laethanta saoire scoile a choinneáil i gcumhne agus socruithe á ndéanamh do shaoire teaghlaigh (nóta re: laethanta saoire).

### Ról na scoile

- Glaofar an rolla gach lá ag 10.10am sna ranganna. Cuireann an múinteoir an tinreamh sa leabhar rolla agus sa leabhar beag agus cuirtear an leabhar beag chun na hoifige
- Cuirtear an rolla mór chun na hoifige gach Aoine ag 2.20pm.
- Coinníonn an múinteoir nótaí/litreacha a bhaineann le as láithreachtaí agus cuirtear chun na hoifige iad ag deireadh na bliana nó nuair a chuirtear fios orthu
- Sa chás go bhfuil go leor ama cailte ag páiste agus nach bhfuil leithscéal tugtha cuirfidh an príomhoide fios ar an tuismitheoir/caomhnóir chun an scéal a phlé

- Má chailleann páiste 20 lá nó níos mó tá sé de dhualgas ar an scoil na sonraí faoin as láithreach a chur ar fáil don Bhord Náisiúnta Leasa Oideachais. Déantar seo ceithre huairé i rith na scoilbhliana.
- Déantar teagmháil le tuismitheoirí/caomhnóirí (ó bhéal agus i scríbhinn) nuair atá 20 lá cailte ag páiste

### **Straitéisí Scoile Uile chun deá-thinreamh a chothú**

- Mínítear do na tuismitheoirí/caomhnóirí nua an dlúthbhaint idir deá-thinreamh agus dul chun cinn sásúil an pháiste. Déantar seo ag cruinniú do thuismitheoirí/caomhnóirí nua sula dtosaíonn na páistí ar scoil. Cuirtear cóip den straitéis se ar fáil dóibh. Beidh fáil ar an straitéis ar an ngréasán scoile go luath (Feabhra 2012)
- Mínítear do thuismitheoirí na scoile an dualgas atá ar an scoil tinreamh na bpáistí a chlárú agus an dualgas atá ar na tuismitheoirí/caomhnóirí míniú a thabhairt ar as láithreachtaí (Acht Oideachais 2000 Leas)
- Meabhraítear do thuismitheoirí an tábhacht a bhaineann le deá-thinreamh ag cruinnithe tuismitheoirí/múinteoirí. Cuirtear tuismitheoirí ar an eolas má tá go leor laethanta cailte ag a gcuid páistí ag na cruinnithe céanna
- Bronntar teastais ar pháistí a chailleann níos lú na trí lá scoile ag searmanas ag deireadh na bliana
- Bronntar plaiceanna orthu seo nach gailleann lá scoile i rith na bliana
- Tugtar gach cúnamh do clanna atá faoi bhrú ag fadhbanna eacnamaíochta/baile chun cabhrú leo na páistí a spreagadh chun dul ar scoil
- Tugtar cúnamh do pháistí a chailleann go leor am scoile ionas nach gailleann siad amach ar obair scoile

### **Aistriú Scoile**

Má aistríonn páiste go scoil eile coinneofar ainm an pháiste ar rolla Scoil Chualann go dtí bhfaigheann an scoil foirm aistrithe ón scoil nua.

Má aistríonn páiste ó scoil eile go Scoil Chualann is gá do phríomh oide Scoil Chualann foirm aistrithe a chur ag an scoil ina raibh an páiste.

Cuireann an scoil tuairisc bhliantúil ar thinreamh chuig an Bord Náisiúnta Leasa Oideachais.

Beidh fáil ar an gcáipéis seo ar an suíomh gréasáin. Mínítear an straitéis ag cruinniú na dtuismitheoirí nua gach bliain.

Tá an straitéis seo i bhfeidhm ó 2008. Déantar athbhreithniú uirthi go tráthrialta.